

## **PROPOSTA**

### **ASUNTO: sobre apoio a proposición de lei para a aplicación de medidas urxentes en materia de rexime local presentada no Congreso dos deputados**

Ó abeiro do establecido no artigo 97.3 do ROF o Grupo político municipal Mixto a través do seu voceiro de Somos Cabanas - Participación Democrática Directa presenta a seguinte moción para o seu debate no vindeiro Pleno ordinario da Corporación de outubro de 16:

### **EXPOSICIÓN DE MOTIVOS**

As Administracións Locais foron as grandes prexudicadas polas políticas de austeridade levadas a cabo nos últimos anos polo Goberno central do Partido Popular. A modificación do artigo 135 da Constitución Española no ano 2011 elevou ao máximo expoñente normativo o concepto de "estabilidade orzamentaria", que foi posteriormente desenvolvido a través da Lei Orgánica 2/2012, de 27 de abril, de Estabilidade Orzamentaria e Sustentabilidade Financeira, así como pola Lei 27/2013, de 27 de decembro, de Racionalización e Sustentabilidade da Administración Local, coñecida como "Lei Montoro".

Desde entón, as reformas impulsadas desde o Goberno Central supuxeron un retroceso considerable na autonomía dos gobernos locais. Atopámonos ante unha situación de emerxencia histórica no municipalismo, e por iso é urxente e imprescindible rematar coa asfixia competencial e financeira actual coa que a Lei 27/2013 somete os concellos. Unha Lei que ademais contou, desde a súa tramitación, co absoluto rexeitamento de case todas as forzas parlamentarias representadas no Congreso. Mostra disto é o nulo consenso que se xerou durante a súa elaboración e aprobación, así como os recursos de inconstitucionalidade interpostos ante o Tribunal Constitucional por parte de case todo o arco parlamentario e varios Parlamentos e Gobernos Autonómicos. Recursos que derivaron na anulación parcial de distintos e transcendentales preceptos da Lei 27/2013.

No caso dos concellos, foron máis de 3.000 de todo o Estado, que representan máis de 16 millóns de cidadáns e cidadás, os que expresaron o seu rexeitamento a esta normativa e saíron en defensa da autonomía local.

Supostamente, o obxectivo da Lei 27/2013 era axustar o funcionamento das Administracións Locais á conxuntura económica baixo o pretexto do malgasto, o solapamento de competencias e o incumprimento financeiro. Porén, os efectos que en realidade se produciron foron unha mingua importante nos servizos públicos prestados polas Corporacións locais, un incremento das privatizacións co seu consecuente aumento nos custos para a administración e unha redución nas competencias municipais.

Neste sentido, a lei introduciu cambios substanciais no funcionamento dos concellos, deputacións (ou semellantes) e comunidades autónomas, amputando garantías democráticas, de representación e participación cidadá, recortando servizos sociais que se prestaban nos concellos de xeito satisfactorio e, en consecuencia, atentando contra o ámbito competencial das CCAA e contra a autonomía local, como incluso declarou o Tribunal Constitucional.

Por todo o anterior, o pasado 4 de outubro de 2016 rexistrouse no Congreso dos Deputados a "Proposición de Lei para a aplicación de medidas urxentes en materia de réxime local polo Grupo Confederal Unidos Podemos-En Comú Podem-En Marea", que contou co apoio de dúas de concellos de todo o estado, representados alí polos de Madrid, Barcelona, Zaragoza, Cádiz, A Coruña e València. Con esta Proposición preténdese implementar medidas urxentes que lles permitan aos concellos, ata que haxa unha nova Lei de Bases de Réxime Local, prestar os servizos esenciais necesarios para o funcionamento dos nosos concellos. Enténdese que o ámbito local constitúe un espazo fundamental para a defensa e a loita polos dereitos sociais como o dereito á sanidade, á educación ou á vivenda e que, polo tanto, é necesario sentar as bases do novo municipalismo do século XXI, que teña como bases a elaboración dunha nova Lei de Bases de Réxime Local, para clarificar e aumentar as competencias dos entes locais; garantir un novo sistema de financiamento local que asegure dereitos e a prestación de servizos esenciais; e garantir a transparencia e a participación directa e vinculante da cidadanía.

## **Grupo Municipal Mixto**

Un novo municipalismo que se insira nunha nova estruturación do marco xuridicopolítico do Estado e do derivado réxime competencial das comunidades autónomas e Corporacións Locais. Un novo marco que preveña substituír as actuais deputacións provinciais.

Cómpre aplicar o criterio de Administración máis próxima á cidadanía, como garantía de universalidade, mellor cobertura territorial, calidade e control democrático na prestación dos servizos públicos, avanzar na formulación dun novo sistema de financiamento local que inclúa a redistribución dos fondos actualmente asignados ás deputacións Provinciais, así como unha Lei de Facendas Locais de Galicia, que amplíe a participación dos concellos nos ingresos da Comunidade Autónoma e que redefina os actuais mecanismos de reequilibrio territorial.

En definitiva, trátase de construír concellos con dereitos, e recuperar os dereitos das persoas que os habitan.

Por todo o exposto, o Grupo Mixto-PDDdG propoñemos ao pleno os seguintes ACORDOS

- 1. Apoiar a tramitación nas Cortes Xerais do Estado da proposición de lei para aplicación de medidas urxentes en materia de réxime local e, por conseguinte, apoiar a derogación parcial e modificación da Lei 27/2013, do 27 de decembro, de racionalización e sustentabilidade da Administración Local.**
- 2. Instar o Goberno Central e todos os Grupos Parlamentarios das Cortes Xerais do Estado a que faciliten e apoiem un proceso participativo e de diálogo e negociación institucional no que estean representados as comunidades autónomas, os entes locais, as asociacións de concellos, a sociedade civil e a cidadanía no seu conxunto, onde se elaboren as bases para a una nova estruturación e réxime xuridico das administracións locais sobre as bases da asunción de novas competencias, de garantir un financiamento adecuado e suficiente, así como a garantir á transparencia e a participación determinante da cidadanía.**
- 3. Instar o novo Goberno da Xunta de Galicia e o Parlamento de Galicia para formularen e para tramitaren unha Lei de Facendas Locais de Galicia, que garanta a autonomía e a suficiencia financeira dos concellos galegos, que amplíe a participación dos Concellos nos Ingresos da Xunta e que redefina os actuais mecanismos de reequilibrio territorial.**
- 4. Instar ao Goberno da Xunta de Galicia e ao Parlamento de Galicia a formularen e tramitaren a modificación da Lei 5/2014, do 27 de maio, de medidas urxentes derivadas da entrada en vigor da Lei 27/2013, do 27 de decembro, de racionalización e sustentabilidade da Administración local, así como da Lei de Administración Local de Galicia e da Lei de delimitación e coordinación das deputacións.**
- 5. Dar traslado deste acorcio ao Goberno do Estado, á Xunta de Galicia, a todos os Grupos Parlamentarios das Cortes Xerais do Estado, do Parlamento de Galicia, así como á Federación Galega de Municipios e Provincias.**

Cabanas, 14 de outubro de 2016

Xosé Manuel Pérez Sardiña

Voceiro